

**SEDMI SASTANAK STRANA
OKVIRNOG SPORAZUMA
O SLIVU RIJEKE SAVE
Bled (Republika Slovenija), 7. juni 2018.**

DEKLARACIJA

**SEDMI SASTANAK STRANA
OKVIRNOG SPORAZUMA O SLIVU RIJEKE SAVE
Bled (Republika Slovenija), 7. juni 2018.**

DEKLARACIJA

MI, STRANE OKVIRNOG SPORAZUMA O SLIVU RIJEKE SAVE, okupivši se u Bledu 7. juna 2018. na svom sedmom sastanku,

Svjesni velikog značaja rijeke Save, njenog okoliša i prirodnih resursa za privredno i socijalno blagostanje i životni standard građana, kao i presudne važnosti regionalne saradnje i koordinacije Strana Okvirnog sporazuma o slivu rijeke Save (u daljem tekstu: Okvirni sporazum) kako bi se postigao održivi razvoj u slivu rijeke Save,

Prepoznajući rezultate od kojih Strane mogu imati koristi, kao i štetu koju je moguće izbjeći ili ublažiti slijedom aktivnosti Strana kroz postojeće dvostrane ugovore i unutar Međunarodne komisije za sliv rijeke Save (u nastavku: Savske komisije), putem provođenja Okvirnog sporazuma i njegovih protokola,

Potvrđujući svoje političko opredjeljenje za preduzimanjem svih potrebnih napora za provođenje direktiva i politika EU značajnih za ostvarenje ciljeva Okvirnog sporazuma i njegovih protokola, posebno Direktive 2000/60/EZ Evropskog parlamenta i Vijeća o uspostavi okvira za djelovanje Zajednice u području vodne politike (Okvirne direktive EU o vodama) te Direktive 2007/60/EZ o procjeni i upravljanju rizicima od poplava (Direktive EU o poplavama), kao i politike o transevropskoj prometnoj mreži (TEN-T),

Ponovo ističući važnost prvog Plana upravljanja slivom rijeke Save (Sava RBM plana) koji su Strane odobrile 2. decembra 2014., kao prekretnice za saradnju Strana u provođenju Okvirnog sporazuma,

Svjesni neophodnosti zajedničkog djelovanja u području odbrane od poplava u skladu s Protokolom o zaštiti od poplava uz Okvirni sporazum kao efikasnim međunarodno-pravnim okvirom za uspješnu regionalnu saradnju u tom području, naročito u smislu razvoja *Plana upravljanja rizikom od poplava u slivu rijeke Save* i uspostave *Sistema prognoziranja poplava i upozoravanja na poplave u slivu rijeke Save*,

Naglašavajući važnost obnove i razvoja plovnog puta rijeke Save za dalji privredni i socijalni razvoj regije,

Razmotrivši šeste nacionalne izvještaje o provođenju "Okvirnog sporazuma" i analizu koju je pripremila Savska komisija te *imajući u vidu* opredjeljenja Strana izražena u "Deklaraciji sa šestog sastanka Strana",

I. Koordinacija saradnje u području voda u slivu rijeke Save

1. *Pozdravljamo* sve relevantne dokumente pripremljene u okviru Savske komisije te *prihvatamo* "Izvještaj o provođenju Okvirnog sporazuma o slivu rijeke Save i radu Savske komisije u periodu od 1. aprila 2016. do 31. marta 2018.",
2. *Cijenimo* napore Strana, Savske komisije, njenog Sekretarijata i stručnih tijela u provođenju Okvirnog sporazuma i njegovih protokola te *prepoznajemo* značajan sveukupan napredak u

ostvarenju zajednički dogovorenih ciljeva utvrđenih Okvirnim sporazumom ostvaren tokom izvještajnog perioda,

3. *Izražavamo zadovoljstvo* zbog toga što je Savska komisija prihvatila "Zajednički akcioni plan za sliv rijeke Save" kao koordinirani program višenamjenskih i integriranih intervencija kako bi se ojačalo sveukupno planiranje upravljanja riječnim slivom, poboljšala plovidba, potaknulo upravljanje rizikom od poplava, razvijao održivi turizam, štitio okoliš i provodila prilagođenja klimatskim promjenama,
4. *Izražavamo zahvalnost* donatorima, relevantnim partnerskim organizacijama i svim drugim subjektima na pomoći radu Savske komisije te se *nadamo* njihovoj podršci i saradnji i u budućim aktivnostima Savske komisije.

II. Održivo upravljanje vodama u slivu rijeke Save

5. *Potvrđujemo* svoju predanost daljem ulaganju napora na provođenju Programa mjera koji čini integralni dio prvog Plana upravljanja slivom rijeke Save, kako bi se ostvarili zajednički dogovoreni okolišni ciljevi i vizije na nivou sliva,
6. *Cijenimo* napore Savske komisije i Strana u 2. ciklusu planiranja upravljanja riječnim slivom u skladu s Okvirnom direktivom o vodama te napredak ostvaren u tom smislu, a naročito pripremu 2. analize sliva rijeke Save i dokumenta o Značajnim pitanjima upravljanja vodama u slivu rijeke Save,
7. *Potvrđujemo* svoju predanost osiguranju prikladnih ljudskih i finansijskih resursa za pripremu 2. plana upravljanja slivom rijeke Save te *zadužujemo* Savsku komisiju da nastavi ulagati s tim povezane napore u vezi s prikupljanjem sredstava,
8. Naglašavajući važnost održivog razvoja u slivu *potičemo* Savsku komisiju da nastavi dijalog s relevantnim interesnim grupama u području plovidbe, hidroenergetike, poljoprivrede, zaštite prirode i upravljanja poplavama, u cilju integracije privrednih, društvenih i okolišnih vidova u planiranju i provođenju infrastrukturnih projekata,
9. Uvažavajući postojeće obaveze Strana - članica EU i država u postupku pristupanja EU, *cijenimo* napore i djelovanje Savske komisije i Strana uložene u pripremu zajedničkog Plana upravljanja rizikom od poplava za sliv rijeke Save (Sava FRM plana) te *podržavamo* sve aktivnosti usmjerene na uspješan dovršetak i usvajanje Sava FRM plana,
10. *Izražavamo zadovoljstvo* rezultatima ostvarenim u uspostavi Sistema prognoziranja poplava i upozoravanja na poplave u slivu rijeke Save (Sava FFWS-a) te se *obavezujemo* osigurati njegovo funkcioniranje u operativnoj fazi osiguranjem prikladnog osoblja, redovnog održavanja i kontrole učinka Sava FFWS-a, kao i redovnog obrazovanja angažiranih stručnjaka,
11. *Prepoznajemo* velik potencijal Sava FFWS-a te *snažno podržavamo* planove za njegovo dalje poboljšanje, a naročito planove u vezi sa spremnošću u slučaju suše,
12. *Cijenimo* značajne rezultate ostvarene kroz zajedničke napore Savske komisije i Strana u hidrološkom i hidrauličkom modeliranju te se *obavezujemo* nastaviti unapređivati modele kako bi se povećala njihova korisnost za razne svrhe zajedničkih aktivnosti,
13. *Potičemo završno usklađivanje* Protokola o iznenadnim situacijama uz Okvirni sporazum, uzimajući u obzir izuzetnu važnost tog protokola za provođenje Okvirnog sporazuma, te

požurujemo Strane koje to još nisu učinile da preduzmu nužne korake kako bi se osigurala neprekidna operativnost (24/7) Glavnih međunarodnih centara za uzbunjivanje u slučaju nezgoda koje mogu izazvati zagađenje voda,

14. *Sa zadovoljstvom primjećujemo* da su sve Strane ratificirale Protokol o sprječavanju zagađenja voda uzrokovanog plovidbom uz Okvirni sporazum i Protokol o upravljanju nanosom uz Okvirni sporazum te se *obavezujemo* preduzimati sve potrebne korake koji vode ostvarenju ciljeva tih protokola.

III. Plovidba u slivu rijeke Save

15. *Potvrđujemo* svoju predanost obnovi i razvoju plovidbe na rijeci Savi i njenim plovnim pritokama, imajući u vidu značaj plovidbe za dalji privredni i socijalni razvoj regije,
16. *Naglašavamo* neophodnost potpunog deminiranja obala rijeke Save, kao i *pravovremenog osiguranja* finansijskih sredstava za izvođenje radova na obnovi i razvoju plovnog puta rijeke Save, kako bi se radovi mogli odvijati koordinirano u svim Stranama,
17. *Pozdravljamo* aktivnosti na pripremi nužne dokumentacije za obnovu sektora plovnog puta Novi Grad, radove na razvoju infrastrukture u luci Slavonski Brod te radove na obnovi kritičnih sektora plovnog puta u Srbiji,
18. Iako planirane mjere za obnovu i razvoj plovidbe na rijeci Savi predstavljaju odgovornost Strana, *zadužujemo* Savsku komisiju da Stranama nastavi pružati svu potrebnu pomoć u kontaktima s relevantnim međunarodnim institucijama, kako bi se našlo više mogućnosti i mehanizama za podršku i finansiranje aktivnosti u vezi s obnovom i razvojem plovidbe na rijeci Savi te praćenjem i koordiniranjem njihovog provođenja,
19. *Podsjećamo* na poseban značaj održivog i za okoliš prihvatljivog razvoja plovidbe na rijeci Savi te s tim u vezi *potičemo* nastavak provođenja načela "Zajedničke izjave o vodećim principima za razvoj unutrašnje plovidbe i zaštite okoliša u slivu rijeke Dunav",
20. *Potičemo* Strane da aktivno prate i kontroliraju provođenje odluka Savske komisije u području plovidbe na svojim državnim područjima,
21. *Cijenimo* velike napore i rad Savske komisije i Strana na završetku i objavljivanju drugog izdanja "Albuma mostova na rijeci Savi i njenim plovnim pritokama",
22. *Pozdravljamo* početak službenog funkcioniranja internet aplikacije za podršku inspekcije sigurnosti plovidbe, od 1. februara 2018. godine, i *potičemo* Strane da iskoriste puni potencijal aplikacije kako bi se poboljšala sigurnost plovidbe u slivu rijeke Save.

IV. Medusektorska pitanja u provođenju „Okvirnog sporazuma“

23. Prepoznajući vjerovatne posljedice klimatskih promjena na vodni režim u slivu rijeke Save i potrebu za efikasnim mjerama prilagođenja, kao i važnost "Pariškog sporazuma", *cijenimo* velike napore i rad Savske komisije i Strana u vezi s procjenom uticaja klimatskih promjena i razradom mogućih mjera prilagođenja u slivu te *potičemo* Savsku komisiju i Strane da preduzmu dalje korake potrebne za izradu Strategije za prilagođenje klimatskim promjenama u slivu te pripadajućeg akcionog plana,

24. *Izražavamo zadovoljstvo* izuzetnim napretkom postignutim u odnosu na razmjenu informacija u slivu putem daljeg poboljšanja i nadogradnje geografskog informacijskog sistema za sliv rijeke Save (Sava GIS-a) kao i hidrološkog informacijskog sistema za sliv rijeke Save (Sava HIS-a), naročito u vezi s upravljanjem riječnim slivom i odbranom od poplava, te se *obavezujemo* preduzeti sve mjere potrebne za osiguranje prikladnog funkcioniranja i održavanja tih sistema, kao i za njihovu dalju nadogradnju u skladu sa svim drugim ciljevima i područjima saradnje Okvirnog sporazuma,
25. *Podsjećamo* na veliki potencijal za sinergiju između procesa provođenja Okvirnog sporazuma i strategija EU za dunavsku i jadransko-jonsku regiju, te *uočavamo* potencijalne koristi od primjene najboljih iskustava u provođenju Okvirnog sporazuma na provođenje strategija EU,
26. *Potičemo* dalje provođenje Okvirnog sporazuma na cjelovit način, kao preduslov za održivo korištenje resursa i dalji razvoj regije temeljen na "zelenim" i "plavim" razvojnim rješenjima za sliv rijeke Save,
27. Prepoznajući važnost održivog turizma kao značajne djelatnosti koja dovodi do privredne koristi, i koja, između ostalog, omogućuje zapošljavanje, poboljšava kvalitet života te promovira međusobno povezivanje i širi vidokruge među Stranama, *obavezujemo se* preduzeti mjere na nacionalnom nivou koje su potrebne za pružanje podrške naporima Savske komisije u daljem razvoju održivog turizma u slivu rijeke Save,
28. *Pozdravljamo* korištenje efikasnih mehanizama za učešće javnosti i uključenje interesnih grupa na nivou sliva, uključujući Savsko vijeće za vode kao savjetodavnu platformu Savske komisije, kao i održavanje sastanaka Parlamenta mladih sliva rijeke Save.

Završne napomene

29. *Cijenimo* značajnu podršku koju su međunarodne organizacije i institucije do sada pružile realizaciji projekata važnih za provođenje Okvirnog sporazuma i *pozivamo* ove organizacije i institucije da, kroz preusmjeravanje odgovarajućih finansijskih sredstava, podrže i provođenje budućih prioritetnih projekata i aktivnosti Savske komisije,
30. Prepoznajući važnost učešća Crne Gore u aktivnostima Savske komisije, *potičemo* Crnu Goru da razmotri dalje korake prema punom članstvu u Savskoj komisiji,
31. *Izražavamo* zahvalnost Vladi Republike Slovenije za domaćinstvo sedmog sastanka Strana i *najavljujemo* sljedeći sastanak Strana u Bosni i Hercegovini, 2020. godine.